

考
亭
淵
源
錄

考亭淵源錄卷之九

曹彥約

曹彥約字簡夫都昌人淳熙八年進

學歷建平尉桂陽司錄辰溪令知樂平縣主晉江西
安撫司機宜文字知澧州未上薛叔似宣撫京湖辟
主管機宜文字漢陽關守檄攝軍事時金人大入郡
兵素寡弱彥約搜訪土豪得許嵩俾總民兵趙觀俾
防水道党仲昇將宣撫司軍屯郡城金重兵圍安陸
遊騎闖漢州彥約授觀方畧結漁戶拒守南河觀逆
擊斬其先鋒且遣死士焚其戰艦晝夜殊死戰北度

追擊金人大敗去又遣仲昇劫金人砦殺千餘人仲昇中流矢死奏上補成忠郎漢川簿尉贈仲昇脩武郎官其後二人彥約以守禦功進秩二等就知漢陽嘉定元年詔求言彥約上封事謂敵豈不以歲幣爲利惟其所向輒應所求輒得以我爲易與而縱其欲莫若遲留小使督責邊備假以歲月當知真僞設復大舉則民固以怒矣欲進而我已戒嚴欲退而彼有叛兵決勝可期矣尋提舉湖北常平權知鄂州兼湖廣總領改提點刑獄遷湖南轉運判官時盜羅世傳李元礪李新等相繼竊發桂陽茶陵安仁三縣皆破

壤地千里莽爲盜區彥約至彼督運人心始定遷直
秘閣知潭州湖南安撫時江西言欲招安李元礪朝
命下湖廣議招討之宜彥約言今不行討捕曲徇招
安失朝廷威重若元礪設疑詞以欺重兵則兵不可
撤戍民不得安業元礪果不可降彥約乃督諸將逼
賊巢而屯擊破李新於鄴泚新中創死衆推李如松
爲首如松降遂復桂陽世傳素與元礪有隙至是密
請圖元礪以自效彥約錄賞格報之且告于朝又與
萬緡錢犒其師世傳遂禽元礪彥約還長沙未幾復
出督戰餘黨悉平世傳旣自以爲功遲留以激重賂

彥約諭以不宜格外邀求時池州副都統許俊駐兵吉之龍泉厚賂以結世傳超格許轉官資世傳遂以元礪解江西胡渠爲右司欲以世傳盡統諸峒而爲之帥悉徹江西湖南戍兵彥約固爭之渠不悅然世傳終桀驁不肯出峒彥約密遣羅九遷爲間誘胡友睦許以重賞友睦遂殺世傳江西來爭功不與校擢侍右郎官以右正言鄭昭先言寢其命久之以爲利路轉運判官兼知利州關外乏食彥約悉發本司所儲減價遣糶勸分免役通商蠲稅民賴以濟沔州都統制王大才驕橫制置使董居誼旣不得其柄反曲

意奉之彥約以蜀之邊面諸司並列兵權不一微有小警紛然奉議理財者歸怨於兵弱握兵者歸咎於財寡乃作病夫議獻之廟堂曰古之臨邊求一賢者而盡付之兵權兵權正則事體重兵權專則號令一今廟堂之上患士大夫不奉行詔令惡士大夫不恪守忠實故雖信而用之又以人參之雖以事權付之又從中御以繫維之致使知事者不敢任事畏事者常至失事卒有緩急各持已見兵權財計互相歸咎昔秦隴之俗以知兵善戰聞天下自吳氏世襲以來握兵者志在於怙勢不在於尊上用兵者志在於誅

貨不在於息民本原一壞百病間出至有世將已叛而宣威不覺四郡已割而諸將不知更化之後逆黨既誅而土俗人心其實未改任軍官而領州事者易成藩鎮之權起行伍而立微效者漸無階級之分由阜郊以至宕昌則隴西天水之地其忠義民兵利在戰鬪緩急之際固易鼓率若其恃勇貪利犯上作亂則又不止於大軍而已苟不正其本原磨之以歲月漸之以禮義未見其可也今日之領帥權者必當近邊境必當擁親兵有兵權者必當領經費必當寬用度至於忠義之兵又須有德者以爲統率擇知書者

以爲教導如古人所謂教民而後用之也今議不出此乃欲幸勝以爲功苟安以求免誤天下者必此人也時朝論未以爲然差知寧國府又改知隆興府江西安撫居亡何蜀邊被兵內有張福莫簡之變彥約之言無一不驗遷大理少卿又權戶部侍郎以寶謨閣待制知成都彥約乞赴闕奏事不允又申省乞入對不報改知福州又改知潭州彥約力辭提舉明道觀尋以煥章閣待制提舉崇福宮理宗即位擢兵部侍郎兼國史院同脩撰寶慶元年入對勸帝講學防近習次言當以慶曆元祐聽言爲法以紹聖崇觀諱

言爲戒比年以來有以賣直好名之說見於奏對者
願陛下倚忠直如著龜去邪佞若蝨賊其沮撓讜言
者必加斥逐會下詔求言彥約上封事曰陛下謹定
省以事長樂開王社以篤天倫孝友之行宜足以取
信於天下然兄弟至親猶誤於狂妄小人之手道路
異說猶襲於尺布不縫之謠臣以爲守法者人臣之
職也施恩者人主之柄也漢淮南王欲危社稷張蒼
馮敬等請論如法文帝旣赦其罪廢徙王不幸而死
封其二子於故地此往事之明驗本朝太宗皇帝之
所已行也今若徇文帝緣情之義法太宗繼絕之意

明示好惡無隙可指雖不止謗而謗息矣又言陛下
求言之詔惟恐不逮然外議致疑以爲明言文武似
或止於縉紳泛言小大恐不及於韋布引而伸之特
在一命令之間耳又薦隆州布衣李心傳素精史學
乞官以初品寘之史館從之尋兼侍讀俄遷禮部侍
郎加寶謨閣直學士提舉佑神觀兼侍讀授兵部尚
書力辭不拜改寶章閣學士知常德府陞辭言下情
未通橫歛未革帝曰其病安在對曰臺諫專言人主
不及時政下情安得通苞苴公行於都城則州郡橫
歛無可疑者提舉崇福宮卒以華文閣學士轉通議

大夫致仕贈宣奉大夫嘉熙初賜謚文簡

備遺

黃直卿與吳柔勝書曰曹簡夫得書旦夕即到此豪傑之士紛然而起國勢益強外患自彌

直卿與李敬子書曰簡夫不來甚壯但吾鄉失此賢帥不無嘆恨也

黃營

黃營字子耕隆興分寧人嘗從郭雍朱熹學熹深期之而營亦以道自任反覆論辯必無所疑然後止舉太學進士爲瑞昌主簿監文思院知廬陽縣五溪獠

獷悍當爲詩諭之獠感悅有公事莫敢違通判處州
經總制有額無錢俗號殿最綱營會十年中成賦酌
而取之閣免逋負錢額均等獨以最聞主管官告院
大理寺簿軍器監丞歲餘三遷營乃不樂間行西湖
慨然曰我昔在南北山一水一石無不自題品今無
復情味何耶丐外知台州謝良佐子孫居台者旣播
越流落當求之民間收而教之勤苦夙夜先勸後禁
訟牒銷縮郡稱平治爲濟糴倉爲抵當庫葺民之棲
寄暴露者爲棺千五百置養濟院又剏安濟方以居
病囚皆自有子本錢使不廢故業適謂營條目建置

憂民如家遷袁州哭從弟哀甚得疾卒所著有後齋集

備遺

晦翁答子耕書曰熹數年來疾病日侵患難交至氣血凋瘵大非往時之比來日無幾甚思與四方士友并力切磋以求無負師傳之託而不可得每一念之徒增求歎而已

示喻爲學之意甚善但恐更須看令簡潔明白親切令下功夫處約而易守乃佳耳別紙兩條亦覺繁雜本末始終之說只是要人先其本後其末先其始後

不必如此多說也格物只是就一物上窮至
一物之理致知便只是窮得物理盡後我之知識亦
無不盡處若推此知識而致之也此其文義只是如
此纔認得定便請依此用功但能格物則知自至不
是別一事也

格物致知只是窮理聖賢欲爲學者說盡曲折故又
立此名字今人反爲名字所惑生出重重障礙添枝
接葉無有了期要須認取本意而就中看得許多曲
折分明便依此實下工夫方見許多名字並皆脫離
而其工夫實處却無欠闕耳

兩及疑義比舊益明深矣但尚有繁雜處且就正經
平白玩味又當自見親切處自然直截簡易也

來喻云云足見講學自脩之力甚勉所望所謂動上
求靜亦只是各止其所當止其動則其動者乃理之
當然而不害其本心之正耳近脩大學此章或問頗
詳今謾錄去可以示斯遠也

人心道心之說甚善其無以道心爲主則人心亦化而
爲道心矣如鄉黨所記飲食衣服本是人心之發然
在聖人分上則渾是道心也

病中不宜思慮凡百可且一切放下專以存心養氣

爲務但加趺靜坐目視鼻端注心臍腹之下久自溫
暖即漸見功效矣

徐僑

徐僑字崇甫婺州義烏人蚤從學於呂祖謙門人葉
邇淳熙十四年舉進士調上饒主簿始登朱熹之門
熹稱其明白剛直命以毅名齋入爲祕書省正字校
書郎兼吳益王府教授直寶謨閣江東提點刑獄以
迂丞相史彌遠劾罷寶慶初葛洪喬行簡代爲請祠
迄不受祿紹定中告老得請端平初與諸賢俱被召
遷祕書少監太常少卿趣入覲手疏數千言皆感憤

剴切上劄主闕下逮羣臣分別黑白無所回隱帝數
慰諭之顧兇其衣履垢敝愀然謂曰卿可謂清貧僑
對曰臣不貧陛下廼貧耳帝曰朕何爲貧僑曰陛下
國本未建疆宇日蹙權幸用事將帥非材旱蝗相仍
盜賊並起經用無藝帑藏空虛民困於饋餉軍怨於
掊克羣臣養交而天子孤立國勢阽危而陛下不悟
臣不貧陛下廼貧耳又言今女謁閹宦相爲囊橐誕
爲二豎以處國膏肓而執政大臣又無和緩之術陛
下此之不慮而耽樂是從世有扁鵲將望見而卻走
矣時貴妃閻氏方有寵而內侍董宋臣表裏用事故

僑論及之帝爲之感動改容咨嗟太息明日手詔罷
邊帥之尤無狀者申儆羣臣以朋黨爲之戒命有司
裁節中外浮費而賜僑金帛甚厚僑固辭不受侍講
開陳友愛大義用是復皇子竑爵請從祀周敦頤程
顥程頤張載朱熹以趙汝愚侑食寧宗帝皆如其請
金使至僑以無國書宜館之於外如叔向辭鄭故事
迂丞相意方丐休致帝諭留甚勤遷工部侍郎辭益
堅遂命以內祠侍讀不得已就職遇事盡言以病申
前請乃以寶謨閣待制奉祠卒謚文清僑嘗言比年
熹之書滿天下學者不過割裂掇拾以爲進取之資

求其專精篤實能得其所言者蓋鮮故其學一以真踐實履爲尚奏對之言剖析理欲因致勸懲弘益爲多若其守官居家清苦刻厲之操人所難能也

備遺

晦翁答崇父書曰日用工夫且得如此照管莫令間斷久之浹洽自有見處亦不須別立標的便計工程也敖惰之說如所引孟子隱几而卧以爲當然則已得之矣何必疑其非本有耶不但孟子如孔子取瑟而歌亦是此類但大學之意却是恐人於此一向偏却更不照管今當看此重處識取正意受用省察不

必向閑慢處枉費思索也

陳守

陳守字師中莆田人丞相俊卿次子用蔭補官歷工部員外郎除奉直大夫提舉荆湖南路常平公事嘉定中召爲將作監卒

備遺

文公題師中讀書之齋曰敬恕且爲之銘曰出門如賓承事如祭以是存之敢有失墜已所不欲勿施于人以是行之與物皆春胡世之人恣已窮物惟我所便謂彼奚卹孰能反是歟焉厥躬于牆于茨仲尼子

弓內順于家外同于邦無小無大罔時怨恫爲仁之功曰此其極敬哉恕哉未末無數

弟宓祭文曰惟兄以寬弘之度濟剛直之資忠孝之訓風稟於父敬恕之道又得所師年少蜚譽孝考所知宗正外府俾屬俾禪悉以公選不專父私兄克奮勵報稱是期清漳臨汝廉介不欺歷事三朝靖退自持二紀郎省嫺巧所嗤末乃一陟人皆謂遲兄曰何能過分之宜蓋六受郡而兩去三乘詔而一馳信直道以力行豈畏途之足危惟坎窞以濡滯斯行誼之不虧方湖湘之始寇誠牙孽之易治及威惠之兩失

遂歷歲而蔓滋初抗疏以請討曰紀綱不可以墮值
時論之不然謂居職之非宜奉殊庭之香火伏園閭
之恬嬉倚國恩秩隆昇符竹而不遺盤辭榮而忽疾
猶剴切以陳詞何好善之不足遽一疾以顛隳嗚呼
哀哉

陳定

陳定字師德俊卿第三子用蔭補右承事郎年二十
五卒文公銘其墓曰自周衰官失而民無常產士不
知學或者務爲剽掠纂組之工以希名射利蓋本出
於俯仰寒餓之迫有不獲已者而其後或更以爲能

焉俗弊風訛迭相夸尚於是公卿子弟之才者往往亦慕而爲之無所於迫而徒取銜鬻之羞顧反薄君恩輕世祿捐本學以從事於場屋無用之文舉世競馳恬不覺悟而聖賢脩己治人之方國家禮義廉耻之教益泯泯矣嗚呼斯其爲弊也久矣不有卓然高志遠識之士其孰能有以反之哉如吾師德者蓋庶幾焉而又不及就其志而疾病以死其亦可哀也已師德莆田人姓陳氏名定丞相信安公之第三子也母曰福國夫人譚氏師德生秀異自孩幼已有成人之度年十二三則已知古人爲己之學而不屑爲舉

子之文矣一日以公命因予友括蒼吳君耕老以書
來道其志而請業焉予三復其辭而嘉之然亦意其
必已淫思力索於空幻恍惚之場也則報之曰聖賢
之學雖不可以淺意量然學之者必自其近而易者
始師德於是始欲因予言而反求之旣疲於宿昔思
慮之苦而感疾殆矣其後屢欲求見且將徧求世之
有道君子而師友之竟以病不果行且死猶語其友
方來耕道使言於予以不及相見爲深恨明年其仲
兄守師中見予於建陽遂以耕道所狀行實一通屬
予銘其窆予不忍辭也狀言師德性至孝事信安公

及母夫人曲盡愛敬劑和烹飪必躬必親左右周旋不違義理而未嘗失顏色於兄弟尤友愛以公奏授右承奉郎娶同郡林氏朝請郎一鳴之女年二十有五以淳熙甲午七月己亥卒於其疾之華也公夫人往視之謂曰死生有命汝所知也師德拱手對曰戰戰兢兢如臨深淵如履薄冰又顧其兄屬以問學脩身之意越夕而逝公夫人哭之哀以其伯兄之子福孫後之而塋之石泉祖塋之側嗚呼有如師德之志而其行事可得而書者止於如此是不亦可哀也哉然其所立視世俗之學昧利辱身得已而不已者則

既絕矣夫豈不足以頗慰公夫人之念與其兄弟朋
友之思哉予是以銘曰士孰不學其方則殊毫忽之
差有蹠其徒卓哉若人惟義之學刻意劬躬蹈履前
覺天不耆之以駿其奔淵冰兌矣志氣則存石泉之
瀕于祔于宅孰全其歸視此幽刻

備遺

晦翁答師德書曰示喻格物持敬之方足見向道不
忘之意善善甚善持敬正當自此而入至於格物則
伊川夫子所謂窮經應事尚論古人之屬無非用力
之地若舍此平易顯明之功而必搜索窺伺於無形

無迹之境竊恐陷於思而不學之病將必神疲力殆而非所以進於日新矣况聞左右體羸多病尤當完養思慮毋令過苦成就德器以慰士友之望

林光朝與其父俊卿書曰師德人品甚高生長富貴中而每每欲見古人歸宿之處頃嘗到東閣其所發問皆非舉子習尚曾遣人來借書未嘗及非聖之書簡尺往來意詣而詞不費可見其爲吉人君子渾然美質不待雕鑄也

陳宓

陳宓字師復丞相俊卿第四子少嘗及登朱熹之門

烹器異之長從黃榦遊以父任歷泉州南安鹽稅主
管南外睦宗院再主管西外知安溪縣嘉定七年入
監進奏院時無敢慷慨盡言者宓上封事言宮中宴
飲或至無節非時賜予爲數浩穰一人蔬食而殯御
不廢於擊鮮邊事方殷而椿積又資於妄用此宮闈
儀刑有未正也大臣所用非親即故執政擇易制之
人臺諫用慎默之士都司樞掾無非親暱貪吏靡不
得志廉士動招怨尤此朝廷權柄有所分也鈔鹽變
易楮弊秤提安邊所創立固執已見動失人心敗軍
之將躡躑殿岩庸鄙之夫久尹京兆宿將有守成之

功以小過而貶三牙無汗馬之勞記公勤而擢此政
令刑賞多所舛逆也若能交飭內外一正紀綱天且
不雨臣請伏面諷之罪奏入丞相史彌遠不樂而中
宮慶壽三牙獻道至是爲之罷卻尋遷軍器監簿轉
對言人主之德貴乎明大臣之心貴乎公臺諫之言
貴乎直陛下臨政雖勤而治功未舉奉身雖儉而財
用未豐愛民雖仁而實惠未徧良由上下相蒙務於
欺蔽匪奏囊封有懷畢吐陛下付近臣差擇是有意
於行其言而有司惟取專攻上躬與移咎牧守之章
騰播中外以答觀聽今赤地千里望飛蔽天如此其

可畏猶或諱晦以旱不爲災蝗不害稼其他誣罔抑
又可知臣故曰人主之德貴乎明大臣施設浸異厥
初凡建議求言之人則以他事逐諫官言事稍直則
以他職徙忠憤者指爲不靖切直者目曰沽名衆怨
所萃則相繼超升物論所歸則以次疏外某人之遷
是嘗重人罪以快同列之私忿者某人之擢是嘗援
古事以文邇日之天變者直節重望以私嫌而久棄
老奸宿穢以巧請而牽復使大臣果能杜倖門塞邪
徑則舉措當而人心服臣故曰大臣之心貴乎公臺
諫平居未嘗立異遇事不敢盡言有如金人再通表

關國體近而侍從下至生徒莫不力爭冀裨廟筭獨於言責不出一辭輦轂之下乾沒巨萬莫之誰何州縣之間罪僅毫髮撫以塞責大臣所欲爲之事則遂之所不右之人則排之仁宗時有宰相奉行臺諫風旨之譏今乃有臺諫不敢違中書之誚豈祖宗設官之初意哉臣故曰臺諫之言貴乎直三者機括所繫願陛下愔然悔悟昭明德以照臨百官大臣臺諫亦宜公心直節以副望治之意指陳敝事視前疏尤剴切焉宓遂請罷歸在告日擢太府丞不拜出知南康軍詣史彌遠曰子言甚切當第愚昧不能行殊有愧

耳至官歲大侵奏蠲其賦十之九會流民羣集宓就
役之築江隄而給其食時造白鹿洞與諸生討論改
知南劔州時大旱疫蠲逋賦十數萬且弛新輸三之
一躬率僚吏持錢粟藥餌戶給之創延平書院悉倣
白鹿洞之規知漳州未行聞寧宗崩嗚咽累日無何
請致仕寶慶二年提點廣東刑獄章復三上迄不就
直秘閣主管崇禧觀宓拜祠命而辭職名卒進職一
等致仕三學諸生以起宓爲請而沒已閱月矣初宓
之在朝也寺丞丁煇徃使金宓歎曰世譬未復何以
好爲餞詩有百年中國豈無人之句後數年聞關外

不靖以書抵煇曰蜀口去關外雖遠實如一身近事
可寒心皆士大夫之罪豈非賄道不絕之故耶煇服
其言宓天性剛毅信道尤篤嘗爲朱墨銘謂朱屬陽
墨屬陰以驗理欲分寸之多寡自言居官必如顏真
卿居家必如陶潛而深愛諸葛亮身死家無餘財庫
無餘帛庶乎能蹈其語者端平初殿中侍御史王遂
首言宓事先帝有論諫之直而不及俟聖化之更宜
褒其身後以勸天下之爲臣者帝爲感動詔贈直龍
圖閣所著書有論語注義問答春秋三傳抄讀通鑑
綱目唐史贅厯之藁數十卷藏于家

劉燭 弟炳附

劉燭字晦伯建陽人與弟輶仲受學于朱熹呂祖謙
乾道八年舉進士調山陽主簿燭正版籍吏不容姦
調饒州錄事通判黃奕將以事污燭而已自以職抵
罪去都大坑冶耿某閔遺骸暴露議用浮屠法葬之
水火燭貽書曰使死者有知禍亦慘矣請擇高阜爲
叢冢以葬調連城令罷添給錢及綱運例錢免上供
銀錢及綱本二稅鈔鹽軍期米等錢大脩學校乞行
經界改知閩縣治以清簡庭無滯訟興利去害知無
不爲差通判潭州未上丁父憂僞學禁興燭從熹武

夷山講道讀書怡然自適築雲莊山房爲終老隱居
之計調贛州坑冶司主管文字差知德慶府大脩學
校奏便民五事又奏罷兩縣無名租錢糾集武勇民
兵入奏言前者北伐之役執事者不度事勢貽陛下
憂今雖從和議願益恐懼脩省必開言路以廣忠益
必振公道以進人才必飭邊備以防敵患提舉廣東
常平令守臣歲以一半易薪春末支及冬復償存其
半以備緩急逋欠亭戶錢十萬轉運司五萬煥以公
使公用二庫贏錢補之奏義倉之敝客丁錢之敝小
官俸給之敝舉留守令之敝吏商之敝召入奏事首

論公道明則人心自一朝廷自尊雖危可安也公道廢則人心自二朝廷自輕雖安易危也帝嘉獎遷尚左郎官請節內外冗費以收楮幣轉對言願於經筵講讀大臣奏對反復問難以求義理之當否與政事之得失則聖學進而治道隆矣乞收拾人才及脩明軍政遷浙西提點刑獄巡按不避寒暑多所平反有殺人而匿權家者吏弗敢捕爚竟獲之遷國子司業言於丞相史彌遠請以熹所著論語中庸大學孟子之說以備勸講正君定國慰天下學士大夫之心奏言宋興六經微旨孔孟遺言發明於千載之說以事

父則孝以事君則忠而世之所謂道學也慶元以來
權佞當國惡人議已指道爲僞屏其人禁其書學者
無所依歸義利不明趨向污下人欲橫流廉耻日喪
追惟前日禁絕道學之事不得不任其咎望其旣仕
之後職業脩名節立不可得也乞罷僞學之詔息邪
說正人心宗社之福又請以熹白鹿洞規頒示太學
取熹四書集註刊行之又言浙西根本之地宜詔長
吏監司禁戢強暴撫柔善良務儲積以備凶荒禁科
歛以紓民力兼國史院編脩官實錄院檢討官接伴
金使于盱眙軍還言兩淮之地藩蔽江南干戈盜賊

之後宜加經理必於招集流散之中就爲足食足兵之計臣觀淮東其地平博膏腴有陂澤水泉之利而荒蕪實多其民勁悍勇敢習邊鄙戰鬪之事而安集者少誠能經畫郊野招集散亡約頃畝以授田使毋廣占拋荒之患列溝洫以儲水且備戎馬馳突之虞爲之具田器貸種糧相其險易聚爲室廬使相保護聯以什伍教以擊刺使相糾率或鄉爲一團里爲一隊建其長立其副平居則耕有警則守有餘力則戰帝嘉納之進國子祭酒兼侍立修注官論貢舉五敝時廷臣爭務容默有論事稍切者衆輒指以爲異爚

奏願明詔大臣崇獎忠讜以作士氣深戒諛佞以肅
具僚乞擇州縣獄官冬雷上恐懼爚奏遴選監司以
考察貪吏爲先訪求民瘼有澤未下流令未便民者
悉以實上變而通之則民心悅而天意解矣又請擇
沿邊諸將兼工部侍郎奏乞使沿邊之民各自什伍
教閱于鄉有急則相救援無事則耕稼自若軍政隱
然寓於田里之間此非止一時之利也請城沿邊州
郡罷遣賀正使試刑部侍郎兼職依舊賜對衣金帶
辭不允兩請致仕不允奏絕金人歲幣建制置司於
歷陽以援兩淮夏旱應詔上封事曰言語方壅而導

之使言人心方鬱而疏之使通上旣開不諱之門下
必有盡言之士指陳政事之闕失明言朝廷之是非
或者以爲好名要譽而陛下聽之則苦言之藥至言
之寶陛下棄之而不恤矣其言之疾華言之腴陛下
受之而不覺矣乞罷瑞慶聖節謝絕金使進封子爵
權工部尚書賜衣帶鞍馬兼太子右庶子仍兼左諭
德每講讀至經史所陳聲色嗜欲之戒輒懇切再三
敷陳之進讀詩之說詹事戴溪讀之爲之吐舌卒贈
光祿大夫官其後賜謚文簡所著有奏議史藁經筵
故事東宮詩解禮記解講堂故事雲莊外藁輟仲名

炳淳熙戊戌進士趙汝愚帥閩辟轉運司屬官俾相
度鹽鈔利害歷應城令官至朝請大夫丐祠閒居號
悠然翁

備遺

初文公與書曰得晦伯近問知山中讀書之樂甚慰
但不應舉之說終所未曉朋友之賢者亦莫不以爲
疑可更思之固知試未必得然以未必得之心隨例
一試亦未爲害也

文公與呂伯恭書曰劉氏兄弟燭炳同預薦送熹新
阡與其居密邇兩年相從熟知其嗜學可教

韜仲以書問格物未盡處義未精晦翁曰此學者之通患然受病不在此這前面別有受病處余正叔曰豈其自然乎曰都不干別事本不立耳

又曰韜仲不苟如此不易得其兄晦伯亦甚好他日皆未可量也得子澄書盛稱韜仲居官不苟前日晦伯一再相聚亦甚進益得後來朋友向前如此老朽無復恨矣

真德秀作文簡公墓碑有曰公天資厚重而不浮純一而弗雜又嘗用功於致知力行之地故其言必正言行必正行確然自守以終其身晚躋禁從雖未及

盡行其志而奮忠陳謀察微慮遠汲汲於扶持天下之正論而詭隨迎合以售其私者一無有焉

雲莊孫經書胡玉齋所著易啓蒙通釋曰嘗記兒時從家庭授易聞之先君子云昔晦庵之講學于雲谷也我先文簡雲莊兄弟與西山父子游從最久講論四書之餘必及於易與諸生時凌絕頂登眺觀天地八極之大察陰陽造化之妙蓋其胸中已有真易一部在宇宙間故其所論象數義理自有以見其實而造其微晦庵及雲莊皆谷中書室名

考亭淵源錄卷之九

考亭淵源錄卷之十

傅伯成

傅伯成字景初吏部員外郎察之孫

隆興元年進士第調連江尉試中教官科授明州教授以年少嫌以師自居日與諸生論質往復後多成才改知閩清縣丁父艱服除知連江縣東湖溉田餘二千頃隄壞即下流南港爲右隄三百尺民蒙其利慶元初召爲將作監進太府寺丞言呂祖儉不當以上書貶又言於御史朱熹大儒不可以僞學目之又言朋黨之敝起於人主好惡之偏坐是不合出知漳

州以律已愛民爲本推熹遺意而遵行之創惠民局
濟民病以革機鬼之俗由郡南門至漳浦爲橋三十
五治道千二百丈兩爲部使者遷工部侍郎時權臣
方開邊語尚秘伯成言天下之勢譬如乘舟中興且
八十年矣外而望之舟若堅緻歲月旣久罅漏浸多
苟安旦夕猶恐覆敗乃欲徼倖圖古人之所難臣則
未之知也相府災同列相率唁丞相或以爲偶然者
伯成正色謂天意如此官師相規時也以爲偶然乎
丞相色動遂陳三事一日失民心二曰隳軍政三曰
啓邊釁進右司郎官權幸有私謁者皆峻拒之出爲

湖廣總領朝議欲納金人之叛降者伯成言不宜輕
棄信誓乞戒將帥毋生事御史中丞鄧友龍遂劾伯
成罷之嘉定元年召對面論前日失於戰今日失之
和北使雖返要求尚多陛下不獲已悉從之使和議
成猶可以紓一時之急否則虛帑藏以資敵人驅降
附以絕來者非計也今之策雖以和爲主宜惜日爲
戰守之備權戶部侍郎史彌遠初拜相麻詞有昆命
元龜之語閩帥倪思以爲不當用御史劾罷思伯成
因對及其事帝曰過當者三對曰思固過當但恐摧
抑太過遂塞言路乞明詔臺諫侍從竭盡底蘊無以

思爲戒李壁謫居撫州伯成言侂冑之誅壁與有功
不酬近功乃追前罪他日負罪之臣不容以功贖過
矣伯成未爲諫官也嘗言彌遠謀誅侂冑事不遂則
其家先破侂冑誅而史代之勢也諸公要相協和共
議國事若立黨相擠必有勝負非國之福又勸丞相
錢象祖安危大事以死爭之差除小者何必垂異拜
左諫議大夫抗疏十有三皆軍國大義或致彌遠意
欲使有所殫効謂將引以共政謝之曰吾豈傾人以
爲利哉疏乞詔大臣以公減私左遷權吏部侍郎以
集英殿脩撰知建昌府蔡元定謫死道州歸葬建陽

乃雪其寃於朝進寶謨閣待制知鎮江府全活饑民
瘞藏野殍不可勝數制置司欲移焦山防江軍於圖
山石碑伯成謂虛此實彼利害等耳包港在焦圖之
中不若兩砦之兵迭戍焉圖山砦兵素與海盜爲地
伯成廉知姓名會郡都試捕而鞠之無一逸去獄具
請貸其死黥隸諸軍嘉定八年召赴闕辭不獲行至
蒲拜疏曰臣病不能進矣除寶謨閣直學士通奉大
夫致仕理宗即位拜直學士落致仕予祠賜金帶伯
成辭免乃進昭明天常扶持人極之說詔進一官寶
慶元年與楊簡同召尋加寶文閣學士提舉佑神觀

奉朝請雖力以老病辭而愛君憂國之念不少衰聞大理評事胡夢昱坐論事貶憾然語所親曰向呂祖儉之謫吾爲小臣猶嘗抗論今蒙國恩叨竊至此而不言誰當言者遂抗疏曰臣恐陛下不復聞天下事矣方今內無良吏田里怨咨外無名將邊陲危急而廉耻道喪風俗益媮賄賂流行公私俱困謂宜君臣上下憂邊恤民以彌禍亂柰何今日某人言某事未幾而斥明日某人言某事未幾而斥則是上疏者以共工驩堯之刑加之矣昔韓愈論後世人主奉佛運祚短促唐憲宗大怒將抵以死自崔羣裴度戚里諸

賢皆爲愈言止貶潮州尋復內徙今上疏者非可愈
比然在列之臣無一爲言者萬一死於瘴癘陛下與
大臣有殺諫者之謗史冊書之有累聖治臣垂盡之
年與斯人相去風馬牛之不相及獨以受恩優異效
其瞽言不報明年加龍圖閣學士轉一官提舉鴻慶
宮復辭伯成純實無妄表裏洞達每稱人善不啻如
已出語及姦人誤國刑人害正詞色俱厲不少假借
常慕尸諫疏草畢亟命繕寫朝服而逝年八十有四
贈開府儀同三司諡忠簡

鄭性之

鄭性之字信之初名自誠後改今名福州人弱冠從
朱熹學嘉定四年進士第一歷官知贛州改知隆興
府後以寶章閣待制提舉上隆萬壽宮進華文閣待
制提舉上清太平宮進敷文閣待制知建寧府端平
元年召爲吏部侍郎入對言陛下大開言路以通壅
蔽心苟愛君誰不欲言言不切直何能感動譬如積
水久壅一決其勢必盛其聲必激激言者多則易於
取厭言之激則難於樂受若少有厭倦動於詞色則
讒諂乘間或不自知矣又言願陛下明詔百辟滌去
舊染一以清白相師權之所在勢所必趨恐懼戒謹

尤防其微以保終譽毋招謗議則朝綱肅而國體尊
矣又曰爲君者不以堯舜自期則無善治告君者不
陳堯舜之道則無遠猷擢左諫議大夫言臺臣交進
互詆願陛下監古今天下安危之變君子小人消長
之機公以處之迺得其當况夫聽言之道宜以事觀
若言果有關國體有補治道有益主德則言之過激
夫亦何傷彼雖求名我實有益惟虚心納善若決江
河則激者自平拜端明殿學士僉書樞密院事進同
知樞密院事兼權叅知政事尋拜叅知政事兼同知
樞密院事尋知樞密院事兼叅知政事加觀文殿學

士致仕寶祐二年卒

蔡抗

蔡抗字仲節處士元定之孫從朱熹學舉紹定二年進士其後差主晉尚書刑工部架閣文字召試館職遷秘書省正字陞校書郎兼樞密院編修官遷諸王宮大小學教授疏奏權姦不可復用國本不可不早定帝善其言遷樞密院編脩官兼權屯田郎官歷遷權吏部尚書加端明殿學士同僉書樞密院事兼同知樞密院事拜叅知政事落職予祠起居郎林存請加竄削從之未踰年復端明殿學士提舉洞霄宮乞

致仕轉一官守本官職致仕卒謚文簡以犯祖諱更謚文肅

吳獵

吳獵字德夫潭州醴陵人舉進士初主潯州平南簿時張栻經畧廣西以獵薦尋知常州無錫縣用陳傅良薦召試守正字光宗以疾久不覲重華宮獵上疏曰今慈福有八十之大母重華有垂白之二親陛下宜於此時問安上壽恪恭子職辭甚切又白宰相留正乞召朱熹楊萬里時陳傅良以言過宮事不行求去獵責之曰今安危之際判然可見未聞有章裾折

檻之士公不於此時有所奮發爲士大夫倡第潔身而去於國奚益傳良爲改容謝之寧宗即位遷校書郎除監察御史上趣修大內將移御獵言壽皇破漢魏以來之薄俗服高宗三年之喪陛下萬一輕去喪次將無以慰在天之靈又言陛下即位未見上皇宜篤厲精誠以俟上皇和豫而祇見焉會僞學禁興獵言陛下臨御未數月今日出一紙去宰相明日出一紙去諫臣昨又聞侍講朱熹遽以御批昇祠中外惶駭謂事不出於中書是謂亂政獵旣駁史浩謚又請以張浚配享阜陵曰艱難以來首倡大義不以成敗

利鈍異其心精忠茂烈貫日月動天地未有過於浚也孝宗規恢之志一飯不忘歷考相臣終始此念足以配孝宗在天之靈亦惟浚一人爾議皆不合出爲江西轉運判官尋劾罷久之黨禁弛起漕廣西除戶部員外郎總領湖廣江西京西財賦韓侂冑議開邊獵貽書當路請號召義士以保邊場刺子弟以補軍實增棗陽信陽之戍以備衝突分屯陽羅五關以扞武昌杜越境誘竊以謹邊隙選試良家子以衛府庫且謂金人懲紹興末年之敗今其來必出荆襄踰湖乃輸湖南米於襄陽凡五十萬石又以湖北漕司和

糴米三十萬石分輸荆郢安信四郡蓄銀帛百萬計
以備進討拔董達孟宗政柴發等分列要郡厥後皆
爲名將召除秘書少監首陳邊事乞增光鄂江黃四
郡戍屬江陵告饑除秘閣修撰主管荆湖北路安撫
司公事知江陵府陞辭請出大農十萬緡以賑饑者
道武昌遣人招商分糴至郡減價發糴米價爲平獵
計金攻襄陽則荆爲重鎮乃修成高氏三海築金鸞
內湖通濟保安四匱達于上海而注之中海拱辰長
林藥山棗林四匱達于下海分高沙東獎之流由寸
金堤外歷南紀楚望諸門東匯沙市爲南海又於赤

湖城西南遇走馬湖熨斗陂之水西北寘李公匱水
勢四合可限戎馬金人圍襄陽德安游騎迫竟陵朝
廷命獵節制本路兵馬獵遣張榮將兵援竟陵招神
馬陂潰卒得萬人分授襄陽德安加寶謨閣待制京
湖宣撫使時金人再犯竟陵張榮死之襄陽德安俱
急吳曦俄反于蜀警報至獵請魏了翁攝參議官訪
以西事募死士入竟陵命其將王宗廉死守調大軍
及忠義保捷分道夾擊金人遂去又督董達等援德
安董世雄孟宗政等解襄陽之圍西事方殷獵爲討
叛計請于朝以王大才彭輅任西事仍分兵抗均房

諸險尋以敷文閣學士兼四川安撫處置使嘉定六年召還卒有奏議六十卷及畏齋集獵初從張栻學乾道初朱熹會栻于潭獵又親炙湖湘之學一出于正獵實表率之

項安世

項安世字平父江陵人淳熙二年進士歷正字戶部員外郎光宗以疾不過重華宮安世上書言陛下仁足以覆天下而不能施愛於庭闈之間量足以容羣臣而不能忍於父子之際以一身之寄於六軍萬姓之上有父子然後有君臣願陛下自入思慮父子之

情終無可斷之理愛敬之念必有油然而時聖心一
回何用擇日早往則謂之省暮往則謂之定即日就
駕旋乾轉坤在反掌間爾疏入不報朱熹召至闕未
幾予祠安世率館職上書留之言御筆除熹宮祠不
經宰執不由給舍徑使快行直送熹家竊揣聖意必
明知熹賢不當使去宰相見之必執奏給舍見之必
繳駁是以爲此駭異變常之舉也夫人主患不知賢
爾明知其賢而明去之是示天下以不復用賢也人
主患不聞公議爾明知公議之不可犯而明犯之是
示天下以不復顧公議也且熹本一庶官在二千里

外陛下即位未數日即加號召畀以從官俾侍經幄
天下皆以爲初政之美供職甫四十日即以內批逐
之舉朝驚愕不知所措臣願陛下謹守紀綱毋忽公
議復留朱熹使輔聖學則人主無失公議尚存不報
俄爲言者劾去通判重慶府未拜以僞黨罷安世素
善吳獵二人坐學禁久廢開禧用兵獵起帥荆渚安
世方丁內艱起復知鄂州俄淮漢師潰薛叔似以怯
懦爲侂冑所惡安世因貽侂冑書其末曰偶送客至
江頭飲竹光酒半醉書不成字侂冑大喜曰平父乃
爾閒暇遂除戶部員外郎湖廣總領會叔似罷金園

德安益急諸將無所屬安世不俟朝命徑遣兵解圍
高悅等與金人力戰馬雄獲萬戶周勝獲千戶安世
第其功以聞獵代叔似爲宣撫使尋以宣諭使入蜀
朝命安世權宣撫使又陞太府卿有宣撫幕官王度
者獵客也獵與安世素相友及安世招軍名項家軍
多不逞好虜掠獵斬其爲首者安世憾之至是斬度
於大別寺獵間于朝安世坐免後以直龍圖閣爲湖
南轉運判官未上用臺章奪職而罷嘉定元年卒所
著易玩辭詩中庸說周禮丘乘說海藻十五卷行于
世

董銖

董銖字叔重饒州德興人晚年登科仕至從事郎婺州金華縣尉嘉定甲戌年六十三卒黃榦誌其墓其畧曰叔重天資警敏勵志於學自其少年已爲鄉閭所稱道叔重亦自負以功名可唾手致也旣冠從鄉之儒先程公洵遊語以晦庵先生所以教人者叔重盡棄所學取大學中庸語孟諸書日夜玩習晷糧入閩樞趨函丈不憚勞苦先生亦愛其勤且敏不倦以教之嘗語之曰更宜深察義利之訓反求諸身推類窮經漸次銷伏使日用之間全在義理上立脚方是

講學之地又曰日用工夫更於收拾持守中就思慮
萌處察其孰是天理孰是人欲取此舍彼以致敬義
夾持之功讀書須是就自己分上體察出來庶幾得
力又曰此心操則自存動靜始終不越乎敬之一字
伊洛拈出此字乃是聖賢學之真的要妙工夫學者
於此着實用功不患不至聖賢之域又曰更宜加意
涵養於日用動靜之間不然徒爲空言無益而有害
也先生嚴重剛毅雖樂於教人然非其資稟志尚可
與適道未嘗陵節施也觀其告叔重之語精切懇到
如此非愛之深望之至也耶則叔重爲人亦可知矣

叔重學益勤志益苦往來師門率不一二歲輒一至
至必越累月而後歸故於先生之書無不通而操存
持守不負其所教慶元初先生歸自講筵日與諸生
論學於竹林精舍命叔重長其事諸生日所誦習叔
重先與之反覆辯難然後即先生而折衷焉僞學之
禁方嚴有平日從學而不通書問者有諱言其學而
更名他師者有變節改行狂歌謔誕市肆以自
污者有昔嘗親厚恨不薦已而反擠之者至其深相
愛者亦勉以散遣生徒爲遠害計諸生雖從學亦有
爲之搖動亦託辭以告歸者叔重正色責之喻以理

義然後諸生翕然以定非其見之明守之剛能若是乎

備遺

銖問或曰天地之數五十有五而大衍之數五十何也銖切謂天地之所以爲數不過五而已五者數之祖也蓋參天兩地三陽而二陰三二各陰陽錯而數之所以爲數五也是故三其三三其二而爲老陽老陰之數兩其三一一其二而爲少陰之數兩其二一其三而爲少陽之數皆五數也河圖自天一至地十積數凡五十有五而其五十者皆因五而後得故五虛

中若無所爲而實乃五十之所以爲五十也一得五而成六

二得五而成七三得五而成八四得五而成九洛書

自一五行至九五福積數凡四十有五而其四十者

亦皆因五而後得故五亦虛中若無所爲而實乃四

十之所以爲四十也一六共宗而爲太陽之位數二七共朋而爲少陽之位數三八

成亥而爲少陰之位數四九同宮而爲太陰之位數不得此五數何以成此四十也即是觀之

河圖洛書皆五居中而爲數宗祖太衍之數五十者

即此五數衍而成之各極其十則合爲五十也是故

五數散布於外爲五十而爲河圖之數散布於外爲

四十而爲洛書之數衍而極之爲五十而爲大衍之

數皆自此五數始耳是以於五行爲土於五常爲信水火木金不得土不能各成一氣仁義禮智不實有之亦不能各爲一德此所以爲數之宗而揲著之法必衍而極於五十以見於用也不知是否文公答曰此說是

銖又問河圖之數不過一奇一耦相錯而已故太陽之位即太陰之數少陰之位即少陽之數少陽之位即少陰之數太陰之位即太陽之數見其迭陰迭陽陰陽相錯所以爲生成也天五地十居中者地十亦天五之成數蓋一二三四已含六七八九者以五乘

之故也蓋數不過五也洛書之數因一二三四以對九八七六其數亦不過十蓋太陽占第一位已含太陽之數少陰占第二位已含少陰之數少陽占第三位已含少陽之數太陰占第四位已含太陰之數雖其陰陽各自爲數然五數居中太陽得五而成六少陰得五而成七少陽得五而成八太陰得五而成九則與河圖一陰一陽相錯而爲生成之數者亦無以異也不知可如此看否啓蒙言其數與位皆三同而二異三同謂一二五二異謂河圖之二在洛書則爲九河圖之四在洛書則爲七也蓋一三五陽也二四

陰也陽不可易而陰可易陽全陰半陰常從陽也然
七九特成數之陽所以成二四生數之陰則雖陽而
實陰雖易而實未嘗易也不知是否文公答曰所論
甚當河圖相錯之說尤佳

陳文蔚

陳文蔚字才卿信州上饒人自少資稟穎異十三能
文既壯從游于朱子之門深造自得以斯道自任隱
居教授屢聘不起講學鉛山著尚書編類十三卷端
平中守臣上其書詔補迪功郎嘉熙己亥卒年八十
六又有克齋藁三十五卷

備遺

文蔚云徐子融嘗有一詩末句云精一危微共一心
文蔚答之曰固知妙旨存精一湏別人心與道心先
生曰他底未是只是答他底亦慢下一句救得少緊
當云湏知妙旨存精一正爲人心與道心

子融謂枯槁之中有性有氣故附子熱大黃寒此性
是氣質之性才卿謂即是本然之性曰子融認知覺
爲性故以此爲氣質之性性即是理有性即有氣是
他稟得許多氣故亦只有許多理才卿謂有性無仁
此說亦是是他元不曾稟得此道理惟人則得其全

如動物則又近人之性矣

文蔚與先生書曰今歲已辭趙館上饒徐簿招教子弟周彥安趙司戶皆遣子弟來學所幸事簡可以讀書兼文蔚自覺有褊急之病徐簿却甚寬緩日夕相聚不無所助但渠目今有部運之役相別動是數月使人悵快爾先生還山間尊體想甚怡適學者往來絡繹當有進道精勇者文蔚近誦詩乃平日所未講今且理會訓詁將正文優游諷咏不能得其意却驗之諸家之說而折衷以先生集傳方此下工他日當請益也近畧見玉山縣學所錄答問語覺見皆是平

日所聞者似無可疑此間士友多疑非先生言謂其出於學者附會有雖知非附會而亦疑其離析太過文蔚再欲詳觀竟未得其本此間却有子顏徐丈持守頗嚴時復相聚亦能使人向前但於先生此說亦未能釋然爾文蔚去歲所答李守約書令嗣敬之收去不審曾再呈否慮有未穩切望開示先生答書云子顏一室蕭然有以自樂令人敬嘆看詩且如此亦佳大凡讀書須且虛心叅驗又當自見切忌便作見解主張也玉山所說當已見之若嫌離析却教他捏作一團也所答守約書大槩得之更當虛心玩味當

更純熟也

問私意竊發隨即鉏治雖去枝葉本根更在感物又發如何曰只得如此所以曾子戰戰兢兢如臨深淵如履薄水

才卿以右手拽涼衫左袖口偏於一邊先生曰公昨夜說手容恭今却如此才卿赧然急义手鞠躬曰忘可先生曰爲己之學有忘耶向徐節孝見胡安定退頭容少偏安定忽厲聲云頭容直節孝自思不獨頭容要直心亦要直自此更無邪心學者湏是如此始得才卿問色容莊最難曰心肅則容莊非是外面做

那莊出來

詳來示知日用工夫精進如此尤以爲喜若知此心此理端的在我則叅前倚衡自有不容捨者亦不待求而得不待操而存矣格物致知亦是因其所已知者推之以及其所未知只是一本元無兩樣工夫也新詩甚佳康節胸懷未易窺測須更於實地加功若只就之乎者也上學他恐無交涉也

文蔚進尚書編類表終篇云竊謂書者精一之旨首傳於三聖彝倫之叙備闡於九疇天文稽七政之齊地理載九州之貢揖遜征誅心同而迹異侯甸男衛

理一而分殊援伊尹於耕野之微相傳說於築巖之
賤官制刑以儆有位德好生以洽民心無逸俾知於
艱難酒誥深懲於沉湎鼎耳雉鳴則祖已之訓入西
旅葵獻則召公之戒陳以至用人建官大則公孤師
傅惟其人微則侍御僕從罔匪正非其人何以經邦
而論道不以正未免親佞而狎邪所繫非輕誠宜罔
忽凡此皆理國安民之要亦豈無統宗會元之方要
知典學之一言是乃尊經之明法

徐僑在講次理宗問考亭門人僑奏上饒陳文蔚臣
嘗令諸子師事之知之尤審先師朱熹與臣書亦云

其人有立作看道理極仔細上曰聞其曾著書傳僑
奏文蔚亦嘗以數篇示臣相與叅訂其解釋坦明易
見陛下倘命守臣給筆札具錄來上而於是經玩繹
焉則帝王傳心建極之要道盡在是矣至是特補文
蔚初品官俾上所著書傳

輔廣

輔廣字漢卿慶源人居嘉興初事呂祖謙後卒業于
考亭淳謹勤恪學禁嚴廣不爲動嘉定間奉祠歸隱
語溪著五經註釋語孟答問一云纂疏詩童子問通鑑集
義日新錄師訓編稱傳貽先生別號潛庵

備遺

文公答漢卿書曰示喻所疑足見探討不倦之意前時所報實有錯誤已令直卿仔細報去矣熹向於中庸章句中嘗著其說今并錄去可見前說之誤也漢卿身在都城俗學聲利場中而能閉門自守味衆人之所不味雖向來金華同門之士亦鮮有見其比者區區之心實相愛重但恨前日相見不款今又相去之遠無由面講以盡鄙意更幾勉力卒究大業

又答曰讀書既有味想見自住不得近看舊作諸書其間有說未透處見此畧加刊削深覺義理之無窮

也

文公答呂子約書曰風色愈勁精舍諸生方幸各散去今日漢卿忽來甚不易渠能自拔向在臨安相聚見伯恭舊徒無及之者說話儘有頭緒好商量非路德章諸人之比也

或謂漢卿多禪語賀因云前承漢卿教訓似主靜坐澄清之語先生曰靜坐自是好廣請于先生求居敬窮理四字先生曰自向裏做工夫何必此因言昔羅隱從錢王巡錢塘城見樓櫓之屬佯爲不曉而問曰此何等物錢曰此爲樓櫓又問何用錢曰所以禦寇

曰未能爾則當移向內施之蓋風之以寇在內故也
漢卿請於先生曰先生昨日言廣言動間多輕率無
那其言也詎底意思此深中廣之病蓋舊年讀書到
適然有感發處不過贊嘆聖賢之善耳都不能玩以
養心自到師席之下一日見先生泛說義理不是面
前物皆吾心固有者如道家說存想法所謂鉛汞龍
虎之屬皆人身內所有之物又數日廣誦義理又向
外去先生云前日說與公道皆吾心固有非在外之
物廣不覺怵然有警于心廣問戒謹不睹恐懼不聞
與謹獨兩段廣思之便是惟精惟一底工夫戒謹恐

懼持守而不失便是惟一謹獨則於善惡之幾察之愈精愈密便是惟精底工夫但中庸論道不可離則先其戒謹而後其謹獨舜論人心道心則先其惟精而後其惟一曰兩事皆少不得惟精惟一底工夫不睹不聞時固當持守然不可不察謹獨時固當致察然不可不持守

先生問誠敬二字如何看廣云先敬然後誠曰且莫理會先後敬是如何誠是如何廣曰敬是把握工夫誠則到自然處曰敬也有把握時也有自然時誠也有勉爲誠時亦有自然誠時且說此二字義敬只是

箇收歛畏懼不縱放誠只是箇朴直慤實不欺誑初時湏著如此不縱放不欺誑到得工夫到時則自然不縱放不欺誑矣

先生諭廣曰今講學也只如此更湏於主一上做工夫若無主一工夫則所講底義理無安着處都不是自家物事若有主一工夫則外面許多義理方始爲我有都是自家物事工夫到時纔主一便覺意思好卓然精明不然便緩散消索了沒意思孟子說學問之道無他求其放心而已所謂求放心者非是別去求箇心來存着只纔覺放心便在此孟子又曰雞犬

則知求之心放則不知求某嘗謂雞犬猶是外物纔放了湏去外面捉將來若是自家心更不用別求纔覺便在這裏雞犬放猶有求不得時自家心則無求不得之理

先生舉伊川說曰人心有主則實無主則虛又一說却曰有主則虛無主則實公且說看是如何廣云有主則實謂人具此實然之理故實無主則實謂人心無以私欲爲主故實先生曰心虛則理實心實則理虛有主則實此實字是好蓋指理而言也無主則實此實字是不好蓋指私欲而言也以理爲主則此心

虛明一毫私意着不得譬如一泓清水有少許砂土便見

廣問人之思慮有邪有正若大段邪僻之思却容易制惟是許多無頭面不緊要底思慮不知何以制之曰此亦無他只是覺得不當思量底便莫要思便從脚下做將去久久純熟自然無此等思慮矣譬如人坐不定者兩脚常要行但纔要行時便自省覺莫要行久久純熟亦自然不要行而坐得定矣又如人有喜做不要緊事如寫字作詩之屬初時念念要做更遏捺不得若能將聖賢言語來玩味見得義理分曉

則漸漸覺得此重彼輕久久不知不覺自然剝落消
殞去何必橫生一念要得別尋一捷徑盡去了意見
然後能如此

真德秀跋文公與漢卿帖曰嘉定初年識公都城容
止氣象不類東南人物話言所及皆諸老先生典刑
私竊起敬當時達官貴人有知公者舉措少不合物
情公輒盡言規戒會中執法新受命遂劾公然在朝
時未知所坐果何事後二十餘年乃見公上政府書
一通其論是非成敗至今無一語弗驗嗚呼賢哉
考亭淵源錄卷之十